

羊村投票日



香港粵語版

下個星期就係羊村學校嘅聖誕聯歡會，
啲羊仔都既興奮又期待。



聖誕聯歡會 揀食物嘅方法


1. 每隻羊仔都會有1張紙
2. 狼校長會有30張紙
3. 黑板上會畫上唔同嘅食物
4. 羊仔同校長都可以揀自己想食嘅食物畫落紙上面
5. 最受歡迎嘅食物就會成為聯歡會大餐嘅食物




狼校長嘅
30張紙

聖誕聯歡會 揀食物嘅方法

1. 每隻羊仔都會有1張紙
2. 狼校長會有30張紙
3. 黑板上會畫上唔同嘅食物
4. 羊仔同校長都可以揀自己想食嘅食物畫落紙上面
5. 最受歡迎嘅食物就會成為聯歡會大餐嘅食物





唉，狼校長又想呃我哋喇，
記唔記得上年佢都係有30張紙，
入面全部都係畫晒豬肉，
最後聯歡會就得豬肉食，
我哋羊仔根本唔食嘅！

羊小香

羊小港



教員室

我仲記得上年我話想畫紅蘿蔔，
狼老師竟然話因為校長唔鍾意橙色，
所以唔畀我哋畫蘿蔔！

羊小素

我哋點可以畀狼校長改變我哋嘅習性
㗎！我哋一向都唔食肉㗎！不如我
哋諗方法改變呢個咁唔公平嘅情況啦！

五隻好有心嘅羊仔就係放學後留低，
一齊諗方法令羊咩咩係聖誕聯歡會
可以玩得開心、食得飽飽，又唔洗被迫食肉。


不如我哋叫埋其他羊仔堅持唔食肉吖，
唔好畀狼校長嚇到改變我哋嘅習性！

羊小初

羊小光

羊小港

我哋每隻羊仔本身都有1張紙，
全校30隻羊仔就有30張紙畫我哋想食嘅食物，
我哋可以係聯歡會之前自己搞個投票日先！




係啲！睇吓最多羊仔鐘意嘅食物係乜嘢，
去到聖誕嗰日再一齊揀返嗰款食物！

羊小香

羊小素




到時就算狼校長嘅30張紙都係畫肉，
我哋揀嘅食物一樣有30張紙，睇吓
佢會點做！



投票日




聖誕 聯歡會



就係嘅，
五隻羊仔開始周圍同其他同學宣傳投票日。
佢哋想羊仔明白點解要搞投票日，
又叫羊仔唔理點都要堅持唔食肉，
仲借呢個機會介紹自己鍾意嘅食物。

所以，咁多位羊仔只要畫出自己最鍾意嘅食物，放入投票箱就可以喇！





其他羊仔聽到佢咁嘅講解，都覺得好期待。
佢咁好開心終於有羊仔咁勇敢，
亦都為有機會決定聯歡會食啲咩而覺得興奮。



好快就嚟到大家期待已久嘅投票日。
全校羊仔都去到學校操場排隊投票。
青草、桑樹葉、白楊葉、紅蘿蔔、薯仔、南瓜……
大家好興奮嘍你一言我一語，
討論究竟揀邊樣食物好。

但五隻羊仔做嘅所有工作，
狼校長都一路監察住，
計劃緊點樣懲罰佢哋……






↓投票箱↓

羊仔投晒票之後，
點票結果好快就出爐喇！
最多羊仔揀咗紅蘿蔔。

佢哋決定聯歡會嗰日會一齊揀紅蘿蔔。



如果狼校長最後都話要
食肉，噉我哋點算呀？

唔理幾肚餓、校長
幾惡都好，我哋都
要堅持唔食肉，直
到食到我哋揀嘅食
物為止！

就喺呢個時候，狼老師去到校長室……

幫我出張通告畀羊仔，
同佢哋講今年唔搞聖誕聯歡會喇，遲啲再搞！
同理，幫我捉晒有份準備投票日嗰五隻羊仔！



到咗第二日，羊仔返到學校見到張通告都覺得好驚訝，明明下個星期就係聖誕節，點解狼校長要延遲搞聯歡會。


不如我哋搵返負責搞投票日嗰五隻羊吖！佢哋應該會知道點算好嘅！





通告欄

聖誕聯歡會
!!!延期!!!





但係……
羊仔搵晒全間學校,
都搵唔到嗰五隻羊……

五隻帶頭嘅羊仔已經被狼校長韞住左。

各位羊仔你哋會唔會因為噉而放棄自己鍾意嘅食物呢？你哋仲會唔會堅持唔食肉？

希望我哋都唔好辜負五隻羊仔嘅心機，終有一日我哋可以自己決定自己嘅事！





羊村投票日 / 民主派立法會初選

1

對應 P. 1

香港立法會以往一直平均分為「功能組別」同埋「地區直選」兩部分。「功能組別」嘅議員多數由唔同組織嘅代表投票選出，依啲代表大多數係體制嘅既得利益者，又或者係中共嘅在港代理人。親中勢力長年佔據「功能組別」絕大部分議席，係議會入面為港府護航。



2

對應 P. 5

因為「功能組別」制度向中共在港代理人傾斜，即使過往立法會有一半議席由全民直選產生，泛民主派亦有辦法改變政府施政或者選舉制度。



3

對應 P. 6

2014年嘅雨傘革命之後，香港本土思潮興起。2016年，港府首次以參選人抱持港獨主張為理由，取消佢哋嘅立法會參選資格。



4

對應 P. 7


因著反送中運動入面醞釀嘅民意，泛民主派係2019年11月直選嘅區議會選舉大舉勝出。民間因此有聲音希望乘勝追擊，係2020年拎埋有立法實權嘅立法會過半數。



5

對應 P. 9

2020年7月，民主派舉辦初選用嚟整合民意，務求集中選票，將最多民主派議員送入立法會，構成立法會大多數，從而掌握政府議案嘅否決權。



6 對應 P. 13

民主派初選係2020年7月11至12日進行，投票人數遠超預期，即使港區國安法嘅陰霾籠罩，仍然有超過60萬香港人行出嚟投票。



7


對應 P. 18

多名係初選獲勝嘅民主派代表隨後遭到港府剝奪參選資格。2020年7月31日，港府更加以武漢肺炎疫情為由，將立法會選舉延期一年。




8 對應 P. 20

2021年，港府大肆拘捕同埋檢控民主派初選主辦方同參選人，當中47人被控「涉嫌顛覆國家政權」罪，大部份陷獄至今。



9 對應 P. 21

同年，中國為咗落實「愛國者治港」，大幅削減香港立法會嘅地區直選議席，並喺各級選舉引入參選人資格審查制度。喺有咗民主派嘅議會入面，港府所有具爭議性嘅議案都獲得肆意通過。



我哋需要你嘅支持
將羊村繪本印成實體
讓香港故事傳得更遠

The Sheep Villagers needs your support.
We are working on a printed version to
share the stories with more people.

點擊前往 Click to Contribute

 patreon.com/sheepvillage



聖誕聯歡會又到喇！狼校長話今年同以前一樣，可以畀羊咩咩投票揀自己鍾意嘅食物。但係，羊咩咩咁多年都未試過食到鍾意嘅嘢食，點解呢？

為咗唔好又畀狼校長恰，羊咩咩今年諗到一個新嘅方法。羊咩咩最後又揀唔揀到自己想食嘅食物呢？

親子共讀：4-7歲
自行閱讀：7歲以上

